

Ina guidada da Surrein/Selva a Surrein/Sedrun

Excursiun dalla vart dretga dalla val cun vesta sin la vart seniastra cun explicaziuns davart la geografia, la historia, la cultura ed ils habitonts.

Quella excursiun culturhistorica e geografica da Selva a Surrein, numnada in' "Egliada silla vart seniastra dalla Val Tujetsch" cun Tarcisi Hendry ha liug sonda, 13 da settember 2025 allas 09.30 – 15.00 cun gentar sin via.

Ella colonna dretga vegnan nudai ils loghens da fermada per l'excursiun. Las detgas aschuntadas duein procurar per empau veta e distracziun.

Liug	Tema
	<p>Il striun ch'era ius a mesiras enta Maighels</p> <p>Cura quels dado igl uaul ein ir inagada a mesiras enta Maighels, han ei era dau in clom ad in vischin da Selva per far vegnir quel cun els. Quel ha dau per risposta: „Vus mu mai, avaun tga vus sègies vidain; sund ju schon era lo!" Ils umens ein ir vinavon. Cura ch'els ein stai enasisum l'alp da Tschamut, vegneva il da Selva pér o sper la caplutta da s. Clau en. Mo cura ch'ils umens ein serabitschai en tegia da Maighels, durmeva il da Selva schon uras ora en treglia. - Quei era il striun da Selva ch'ei han lu mess vi cun catschar cugns.</p> <p>Selva</p> <p>Selva = uaul; im Holz, Salvanix, Sulvanix, Selvaningen.</p> <p>Cull'immigraziun dils Gualsers daventa il vonn da Selva dad oz in Selvaningen. Ils Gualsers ein ils emprems collonists dil vonn da Selva e dil crest da Tschamut. L'urbarisaziun sur tschentanners e la sminuaziun digl uaul per far prau e pastira caschuna el nord da Selva e Tschamut in grond prighel da lavinas. El sid, ella costa dil Tgom, ei il prighel adina staus. Duront il 19avel tschentaner ein numerusas lavinas numnadas. Quella digl onn 1808 ha custau la mort a 25 persunas. La davosa tragedia ha giu liug igl onn 1951 cun in miert. Ulteriuras persunas ein mortas en lavinas ella vischinonza da Selva.</p> <p>Ils onns 1850 ei ina dislocaziun da Selva a Sut Crestas stada actuala, ei denton vegnida praticada mo il temps d'unviern entochen alla fin dil 19avel tschentaner. Cun las plontaziuns, dapi 1890, ei la spunda el nord daventada segira. Sut Crestas daventa in liug da pelegrinadi tier Nossadunna digl agid e liug da scola per Selva e Tschamut. Ils onns 1960 svanescha la caplutta e Sut Crestas daventa in vitget cun in camp per giuvenils.</p> <p>Ils barschaments da 1785 e lu quel digl onn 1949 ein stai tragedias pil vitg muntagnard. Dil barschament da 1785 ei pauc enconuscent. Ditg ei vegniu detg e purtau da generaziun tier generaziun: «Igl entir vitg ei barschus, deno la petga dil begl. Egl urbari san ins leger: Am 20. Oktober 1785 ist das ganze Dorf zu Asche geworden».</p> <p>Igl onn 1949 ein duas casas buca tuccadas dil fiug, tut auter cun tutta rauba e biars animals manedels daventan unfrendas dil fiug. Cun grond agid dall'entira Svizra vegn il vitg reconstruius e semida en fuorma e pareta.</p> <p>La populaziun banduna per gronda part il vitget e serendan autro. Ina midada radicala, forsa era il spindrament, per Selva procura l'erecziun dalla piazza da golf ils onn 1990.</p>

Surrein/Selva

La pesta a Selva

Cura che la muria gronda era stada a Selva, vivevan leu 70 avdonts. Quasi tuts ein morts dalla pesta. Mo dus ein restai vivs e quels eran aunc malperina ed ein i in ord l'auter. In ei ius dalla Punt da Surrein-Selva e lu dalla Punt da Plaun miez orasi Rueras e l'auter ei ius orasi Caspaua da lezza via oragiu a Rueras. Forsa han quels dus stuiu star sil mund per penetenza, perquei ch'els vegnevan buca perina.

Nums locals

Ils nums locals vevan ina nundetg impurtonta funcziun. Mintga prau e prada, mintga tschancun pastira veva siu num. En famiglia enconuscheva mintgin ils nums dils loghens da ses praus, il Prau dalla Tatta, la sdrema si Sumprau, eav. Ils novs pasters en ina alp stuevan scochemai emprender ils nums dallas pastiras. Ils habitonts d'in vitg enconuschevan tut ils nums locals en la vischinonza da quel. Biars vischins enconuschevan quasi l'entira val, sche buca l'entira val. Cun esser stai pasturs empau per l'entira val, sedevan quellas enconuschientschas automaticamein. El mintgadi vegnevan mo sin quella moda indicau ils loghens, ils nums locals fuvan la geografia dalla val.

Battesta Giger da Selva ha skizzau ils nums da Selva a maun sin in toc pupi en fuorma da carta. Cheu suondan ils **74** nums dalla vart seniastra da Nual entochen al Rein da Curnera.

Uaul Nual	Val Ruinatsch Dadains
Nual Sura	Val Ruinatsch Dadora
Nual Sut	Plaun Darvun
Las Pagnas	Crap Gries
Plaun Uaut	Plaunca de Masiras
Uers	Foppa dels Vanauls
Crest Lag	Ils Vanauls
Stavlets	Trutg de Tgauras
La Schetga	Grep de Mengiauns
Platt'Alva	Camaduir
Dutg del Tetg	Grep della Tgauma
Val Dutg del Tetg	Crest Camaduir
Aults dels Stavlets	Caltgera
Stavlets	Tagliolas Sura
Ils Carauns	Tagliolas Dadains
Fontanuglias	Val Scadialas
Bullatscha	Trutg de Surpalits
Surrein	Foppatschas
La Punt	Passnausch
Valetta sur Grep de Schlaz	Sut Stretgs
Sur Grep de Schlaz	Mun Rodun
Grep de Schlaz	Alp Mut
Crap Leischen	Um Crap
Val Tretlusa	Tgaglias de Mut
Stavlets Entadem	Val de Surpalits
Val de Cavals	Ils Barschauns
Grep Gron	Surpalits
Grep Pin	Crap Git
Tagliolas	Pegn Gron
Pegn de Miscalgias	Pegn Pin
Sut il Péz Ruinatsch	Crappa Scharina

Foppa Val Ruinatsch
Grep Tgietschen
Val Ruinatsch

Plaun Miradas
Uaul de Plaun Miradas
Rain de Curnera

La lavina dalla Val Ruinatsch igl onn 1808

Pader Placi a Spescha nota:

Die sehr ausgedehnte, tiefe und abschüssige Thalseite des Ruinatsch brach los, jene von der sogenannten Benaus ebenfalls mit: beyde Lauinen stürzten sich mit donnerndem Gebrülle in die Tiefe des Rheinbettes, erhoben sich wegen gewalthätiger Zerschmetterung [Anprall] neuerdings über das bey **100** Klafter erhöhte Ufer des Rheins; die letztere Lauine gab der ersteren eine unnatürliche Wendung gegen Nordosten; beyde gewannen die oben genannte Ebene, überfuhren sie, griffen gemeinschaftlich das Dorf von Südwesten an, zertrümmerten und begruben alles, was ihnen im Wege stund, nahmen den Thurmknopf von der Kirche sammt dem Kreuz und die Dachschindeln von den Gebäuden mit, stäubten und schleuderten alles bis zur Waldung ob dem Dorfe hin. **6** Häuser wurden zertrümmert, eines stark beschädigt und ein anderes des Daches beraubt. **5** Ställe sind vernichtet und müssen neu gebauet werden und nur zwey blieben unbeschädigt. **42** Personen, folglich die Hälfte der Einwohner, und ein Kind im Mutterleibe, **25** Tote, **37** Stück Rindvieh und ungefähr **200** Stück Schmalthiere lagen unter den Trümmern der Gebäude.

Walter Leeman schreibt **1929** in seiner «Landschaftskunde des Tavetsch» folgendes über das Ereignis:

«Das Dorf liegt dreissig Meter über dem Rhein auf einer Terrasse und lehnt sich nach Norden an eine abschüssige Wand an, von deren Seite her der Siedlung die grösste Lawinengefahr drohte. Der zweite Lawinenzug ging von den Alpweiden Mott und Noal durch das Tobel Ruinatsch nieder, war aber bedeutend seltener.

Im Winter **1808** schneite es unaufhörlich; die ganze Ortschaft siedelte in die dem Rhein am nächsten gelegenen Häuser um, um möglichst weit aus dem Bereich der fast alljährlich niedergehenden Nordlawine zu kommen. Dadurch liefen die Selver dem Unglück in die offenen Arme, denn diesmal löste sich auf der Südseite eine furchtbare Lawine los, die sich über den Rhein hinüberwälzte, am jenseitigen Hang emporbrandete und die unteren Häuser, die vermeintliche Zufluchtsstätte der Menschen, samt und sonders begrub. Das Unglück wuchs sich dermassen aus, weil gleichzeitig zwei Lawinen vom Südhang niedergingen, in spitzem Winkel aufeinanderprallten und sich dadurch so gewaltig aufstauten, dass die Schneemassen am andern Berghang emporschossen.»

Igl onn 1951

Igl onn **1951** vegn era numnaus igl onn dalla neiv gronda. Naven dils 18 tochen ils 21 da schaner veva ei pli u meins neivu tochen varga 2 m. La lavina dil nord destruescha la punt dalla viafier e destruescha la casa egl ost dil vitg. Gion Giusep Giossi, scolast ***1918** miera ella lavina.

Ils 13 e 14 da fevrer **1951** durmevan tuts vischins e vischnas da Selva en dus nuegls. La cozza da neiv era carschida sin 2.80 m. Ils 25 da fevrer vegn evacuau sin la via vi Surrein, ora tier l'aua da Nual e da leu vi Carmihut. Leuen ein aunc restai circa diesch perveseders cun la Barla Giger-Hitz e la Tonia Riedi a Tschamut.

Caltgera

Igl onn **1850** han il vischins da Selva, sin cussegl da lur caplon sur Gion Giusep Deplaz (1788-1859), caplon a Selva da 1818-1859, entschiet cun la construcziun dil vitg d'unviern a Sut Crestas. Gl'emprem baghetg ei la caplutta, cun stanza da scola e abitaziun pil caplon, stada. Ils da Selva han sez barschau la caltschina per la construcziun da lur sanctuari. Da l'autra vart ellas teissas spundas dil Pez Maler han els anflau il prezios crap-caltschina. Sisum la Val Ruinatsch cuchegia in grep da caltschina ord la draussa. Cheu ei vegniu cavau il crap necessari per la caltschina dalla caplutta, per casas e baghetgs. Pli engiu sil plat spel grep numnaus il Grep dalla caltgera (num local era Caltgera) sesanflava la caltgera. Oz ein struschamein indezis d'anflar.

Pastira da casa

Igl um e la femna, che fagevan never si Scharinas

In schliet onn stuevan ils pasturs d'alp savens vegnir culs armauls ella bassa. In di vegnan dus pasturs culla biestga a Surpaliz, da l'autra vart da Selva. Pertgirond leu lur biestga observan ei da l'autra vart sin Scharinas in um ed ina femna en in dutg. Quels mavan pil dutg sidengiu a turschond l'aua. Sin quei di in dils pasturs siper l'auter: „Lein mirar bein, tgei quels dus cheuvi fan plaunsiu!“ Buca ditg, ed els vesan, ch'ei seglian dil dutg giu, tochen tier la seiv, che sparta la pastira dil prau. Igl um seglia lu sur la seiv o el prau e dat a tiara. La femna semetta culla bratscha silla seiv e mira riend, co gl'um leva si. Igl um cuora dal prau si, tochen ch'el arriva si tier ina casa da mises. La femna cuora suenter la seiv vi tochen tier quella casa. Ussa semettan domisdus siper la casa in sper l'auter e lur vestgadira ei vegnida tut alva. L'auter di ha ei dau neiv tochen ella Bassa.

Oragiu Tujetsch, aschia schevan ils da Selva e Tschamut, ha ei adina puspei dau dispetas denter vischins pervia dalla pastira da casa. A Selva ei quei per semeglia buca stau il cass. Sul vitg da Selva, sils Pastgs, fuva la pastira da casa per baul la primavera. Fuva la situaziun buna vegneva pascalau vi Surrein sin biala pastira da casa.

Uaul da vart seniastra

Cuglienai

Gion Paul da Camischolas ed aunc plirs giuvens dils mises, da Mulinatsch e Milez eran i a mattauns giu Selva e fatg l'entira notg striegn e barlot e vilentau las mattauns sco la bargada dalla notg fa.

Encunter la damaun han ei tucchau il zenn dalla baselgia da Selva per spass e lu vuliu turnar a mises. Els ein i ditg e liung per igl Uaul da Sontga Brida entuorn ed ein vegni staunchels. Lu han ei detg: Uss essan nus stai tier las strias e quellas han pudiu tier nus! Lein trer ora ils calzers. Ed els han tratg ora e midau quels, il dretg el pei seniester. Lu han ei viu nua ch'ei eran. Ei eran dadens igl Uaul Tschuppina. Da cheu naven han ei schau en ruaus las mattauns da Selva. Quella historia ei vera.

Tschentaners e decennis ei igl uaul vegnius negligius. L'enna ei vegnida consumada senza mesira e controlla. La conseguenza ei stada che lavinas ei sederschidas a val en loghens che fuvan avon segirs. Ils onns **1850**, exactamein **1853**, sto il cantun intervegnir cun in regulativ fetg rigurus che ordinava il diever da lenna. Controllas fetg strentgas ein vegnidadas introducidas ed uauls ein vegni scumandai da pinar tutta lenna.

La fin dil **19**avel tschentaner entscheivan las plontaziuns, l'emprema ella val cugl

Uaul da s. Brida. Naven da lu han las plontaziuns dad uaul cuntinuau sin l'entira vart seniastra dalla val Tujetsch, da Niregl entochen Val Val. Oz serasa in bellezza uaul sur Selva e schurmegia il vitget da lavinas. Igl Uaul da Rosas, decimaus sin ina pintga surfatscha, ha ussa puspei la funcziun da schurmetg per tut la veta el funs dalla val.

Scalegl

La construcziun da pegnas scalegl ei vegnida importada en Tujetsch neu dil Valleis. Cu quei ei succediu ei struschamein d'eruir. Forsa schizun cun l'immigraziun dils Gualsers! Las pli veglias enconuschentas pegnas ein datadas dall'entschatta dil **19avel**. La pli veglia enconuschenta ei quella da Gion Battesta Monn, Sedrun, digl onn **1786**.

Dadens igl Uaul da Tschuppina ei ina cava da scalegl enconuschenta, numnadamein quella egl Uaul Nual. Ina aveina clar-grischa da scalegl setila silla costa dretga dalla vallada dil Rein e mira ora odem la Val Sumvitg, lu danovamein a Mumpé-Medel ed a Nual, tonscha sur l'aua vi sil Calmut e dat la davosa cuchegiada a Hospental.

Ils **22** da november **1889** vegn entras la suprastonza commuanla concediu a Gurdin Flepp la gruoba da scaleglia egl Uaul Nual e quei cun schar luvrar el treis onns suenter plascher.

Entuorn **1900** luvravan leu in Giger ed in Manetsch da Mustér; pli tard Battesta Jacomet d'Acletta, Mustér, en quella cava. El schava vegnir la crappa cun suga neuvi spel stradun dall'Alpsu a Carmihut.

Cun la cunvegnientscha dils **26-6-1946** ei Gion Giusep Jacomet da Mustér semess en a Nual. Cun ina dunna da Tujetsch (Antonia Cavegn) eis el scochemai staus da casa ella val. Gion Giusep Jacomet fageva silpli **15** pegnas ad onn. Ed el ei staus in bien contrahent culla vischnaunca ed ha adina puspei renovau il contract a Nual e quei entochen sia mort prematura dils **26-10-1974**.

Il cunfin denter Dadens e Dado igl uaul

Quei cunfin sesanfla a Sumsassi, il crap, il grep sisum, viu da Sedrun anora, il cunfin denter Dadens e Dado igl Uaul Tschuppina e partiu la val en duas gruppas en duas parts, quels dadens e quels dado igl uaul. Ils da Selva han aunc retschert in special surnum, numnadamein ils Tarleps ni era Tarlepers. Igl origin da quei plaid ei in svilup classic da Trans lapide = dadens il crap (Sumsassi). Oz ves'ins en quel ina fuorma etimologica che tat en connex cul plai tudestg Lappi (Dummkopf). Cun "Tarlepers" ei surtut manegiau la glied da Selva. Ils habitonts da Tschamut vegnevan numnai "Tschamuters", "Tschamutras"

Dil temps dall'immigraziun dils Gualsers, il **13 e14avel** tschentaner, fuva il Sumsassi in cunfin da lungatg. Il tudestg dils Gualsers ha buca dominau ed ei svanius cun maridaglias ed integraziun.

Cugl onn **1630** retscheiva Selva sia caplutta. Cugl onn **1665** retscheivan els da Cuera la lubientscha per in agen caplon e la lubientscha d'astgar salvar il sontgissim en baselgia. Quella midada ha possibilitau als da Dadens gl'Uaul da saver star las dumengias a Selva. Tschamut ha giu sia caplutta da hospezi dapi l'entschatta dil **16avel** tschentaner (**1500**).

En quella solitariadad ei seformaus in agen dialect, quel da Daden gl'Uaul cun dapli expressiuns dil lungatg sursilvan. Quei ei tgunschamein d'attribuir alla preschientscha da dunnas e da caplons d'ordvart che fuvan era ils scolasts tochen

ils onns 1850. Aschia palidan els dalla marena, digl affon, dils dents, dil venter, dalla caglia, ...

Plaun Miez

Igl uors, la mulesta dallas pastiras ed alps tujetschinas

Nos vegls vevan ina gronda mulesta culs uors, tuttavia en las alps. Tochen els anno 1860 dil 19avel tschentaner, ha ei dau da quels schanis en Tujetsch. Era professer Theobald di en sia descripiun dalla Surselva, 1861, ch'ei detti aunc uors en Tujetsch. Havevan ins cattau ad agur in tal glimari, sche stuevan ins star guardia la notg, scadenar schumbers ni far fiug. Cons pegns ein curdai ella Val Tuietsch per unfrenda da scatschar ils uors! En beinenqual alp vevan ins fatg in claus da mir per tener ensemen la biestga, sch'igl uors era ella vischinonza. Restonzas da tals claus ein aunc en Val Val, a Valtgèva, Nual etc. Nums da Val Uors, Plaun Uors etc. ein aunc oz usitai. Denter auter vegn ei raquintau, ch'igl uors vevi si Mut perfin attaccau il taur; a Nual eri el ius cun zacons purschals. Igl Alexi Hetz vevi entupau in uors vi Plaun-miez e l'auter di vev'el sfracciau in triep nuorsas vi Pazzola.

Il davos uors ha il Tumaisch Riedi (Madleiner) da Rueras sittau vi si Caschlè. (Riedi viveva aunc 1865). El eri perfin staus amauns inaga ad in. Ei eri dus ensemen e cun la muniziun ch'el vevi, er'el mo vegnius da blessar in e stuii ir a casa per quei di. L'auter di ha el aunc fatg vegnir auters catschadurs. Schegie ch'igl uors veva piars saung, han ins buca pli anflau el. Igl onn suenter han ins anflau l'ossa dad in ch'era ruclus.

Il sulet mises privat da vart dretga dil Rein Anteriu.

Igl onn 1842 cumpra Gion Flurin Riedi *“il prau entir claus ora a Plaun Miez, il baghetg grond cun dretgs e regress tenor brevis e scartiras sco ils possessurs han gudiu e possediu per il capital da 1550 renchs (ca. 2550 frs.)”* dils possessurs scarvon Gion Mihel Monn, statatler Vigeli Beer, Thomas Berther, Martin e Thomas Schmid. - Tochen tut ei pagau resta il funs e baghetgs sco pègn (Unterpfand). Dapli ei rugalau ch'ils tiarms mess en dils vendiders astgien buca vegnir tratgs ora entochen che las tschun ratas ein buca pagadas; quei ord motiv che mintgin savess aunc salvar ses agens tocs prau, sch'ei vegness aschilunsch.

Cun igl onn 1855 ei il Plaun Miez documentaus en in contract da cumpra da pastira dalla vischnaunca per engrondir il territori da Plaun Miez entras frars Riedi da Rueras.

Igl onn 1894 cumpra Sep Maria Giger da Medel, sesents Rueras, igl entir Plaun Miez dils possessurs e frars Riedi da Rueras per 12'000 frs.

Dieni

Las vaccas da Putnengia

Ei fuva il di avon Sogn Placi, ch'in pur vegneva ina clara e biala sera en encunter Selva. Arrivaus dadens Diens aud'el in grond scadenem da tiers. El mira giu e vesa entuorn las ruinas da Putnengia in rosch vaccas, che pasculavan per ils praus aunc buca fenai entuorn. Igl um saveva buca capir quei e vegn perquei en gronda tema. Spertamein va el a casa, mo cura ch'el ei lauter di turnaus orda Selva, vesa el per siu grond smarvegl ils praus da Putnengia en flur sco avon e negin havess encurschiu, ch'ei fuss stau en tiers.

Dieni e Rueras han formau in vischinadi e quei tochen al di dad oz. Diens deriva

dil bein „dil Tieni". Ella historia ha Dieni sia impurtonza muort la vischinonza digl anteriur casti da Putnengia, eregius entuorn **1200**. Ils signurs de Putnengia ein stai ils administraturs per la claustra da Mustér duront varga **200** onns. Igl avat Pieder de Putnengia ha giugau ina impurtonta rolla tier la refundaziun e renovaziun dalla Ligia Grischa, ils 16 da mars **1424**. La fundaziun primara ha giu liug igl onn **1395** a Glion.

La midada radicala da quei uclaun ha entschiet ils onns **1960** cun l'ereziun dils runals da leu a Milez e Cuolm Val e d'in grond hotel. Casas da vacanzas ein suandadas ella part dil vest dil Rein dalla Val Giuv e per gronda part el sid dalla part veglia dil vitget d'antruras.

En vesta stat la construcziun d'in "gigantic" resort.

Putnengia

La caura dad aur enasi Putnengia

Ina sera da stgir miravan treis frars da Rueras orda finiastra e lura han ei viu ina caura dad aur che tarlichava sco ina cazzola si spel casti da Putnengia. Sin quei ein ei i per pigliar ella, mo han viu nuot pli. - Quei era in scazi zuppau, ed ins stueva ver ina certa caussa per vegnir vitier.

Il saczi da Putnengia

Allas dudisch per Nadalnotg semuossa in custeivel scazi en la tuor da Putnengia; mo quel ei fetg grevs da survegnir, pertgei in sgarscheivel tgaun ner cun eglis da fiug sesa sin el.

Il casti vegn dataus dils umens dil fatg d'entuorn **1200**. Il casti vegn menziunas per l'emprema gada en in document da **1300**, „ante castrum Bultringen". Il davos dalla schlatta Putnengia vegn numnaus **1515** en Lumnezia. Igl onn **1368** vegn gl'emprem mistral numnaus en in document ed entras il process per dapli libertad, svaneschan era ils signurs administraturs dalla claustra. Aschia ei il casti staus habitaus da quei da rodund **200** onns e dapi lu maglia la natira vid las miraglias historicas.

Schebein il casti en Tujetsch fuva habitaus sur onn ei grev da dir, pertgei la sedia principala dils de Putnengia fuva a Musér el casti da Chischlatsch sut Mumppe Medel. Il clima cun uaul sigl ault dil Pass Alpsu possibilitava carteivel in traffic sur onn. Il traffic tras la val mava en direcziun ost-vest sul Pass Alpsu ed en direcziun nord-sid sul Pass La Crusch – Lucmagn. Quella traversala ei stada impurtonta entochen l'ereziun dalla Punt dil Giavel, numnada l'emprema gada igl onn **1306**. Per far diever dallas vias vegneva incassau duana. La dieschma vegneva incassada dils subdits entras il "meier" a Rueras, in Meierhof.

Famiglia de Putnengia

La schlatteina feudala "de Putnengia" ei nudada l'emprema gada cun Wilhelmus de Putnengia igl onn **1252**. La famiglia duei esser da derivonza gualsra cun sedia a Mustér (Casti da Chischlatsch) e steva en survetsch dalla claustra da Mustér sco administraturs.

Igl onn **1278** s'udevan Wilhelm de Putnengia e siu fegl Hugo tier quels nobels sursilvans che han agiu encunter la claustra. Ils onns **1339** e **1369** funcziunavan Hugo ed Ulrich de Putnengia sco mistrals ad Ursera sin territori dalla claustra da l'auter maun digl Alpsu.

Igl onn **1391** fuva Heinrich de Putnengia administratur clausal, Gl'onn **1397** sigilescha Ulrich de Putnengia a Trun pil pievel dalla Cadi. Igl onn **1404** e lu

danovamein **1438** ein commembers dalla famiglia mediators. Entras ina lètg possedeivan ils de Putnengia era beins ella Lumnezia. Sco avat dalla abbazia da Mustér ei Pieder de Putnengia staus ils onns **1402 – 1438** e porta sco emprem avat il tetel da prenci-avat (Fürstabt). El ha persecutau ina politica dalla pasch e d'agid vicendeivel. Cun siu sustegn ed engaschi persunal nescha ord la Ligia da Gliion (era numnada da Ligia Sura) da **1395** la Ligia Grischa, ch'ei vegnida reafirmada a Trun sut igl ischi ils 16 da mars **1424**.

Relaziuns digl avat Pieder cun Uri ed Ursera

El intensivescha las relaziuns cun Uri ed il Pass Alpsu survegn entras quei dapli muntada. Igl onn **1404** ei en in contract vegniu decidiu da segirar la diagonala Domodossola – Pass s. Giacomo – Gottard – Alpsu encunter enguladetschs ed assagls. La claustra veva grond interess per ina traffic garantiu e segir. Ad Altorf cumpra avat Pieder ina tuor. Denton vegn el buca dad engrondir massivamein sia influenza sin Uri. Il dretg da territori ch'el retscheiva per Ursera vegn limitaus igl onn **1407**. Il possess digl avat astgava buca varga 500 glivras ed en cass da carplinas astgava el buca clamar dertgiras jastras. Igl onn **1410** s'uneschan ils d'Ursera cun Uri cun in contract da dretg da territori. Cun l'engrondaziun dalla Ligia Grischa obtegn igl avat dapli pussonza e forza anovians. Igl onn **1425** engiran ils avdantas dad Ursera obedientscha agl avat. Quei cumin descriva Giachen Casper Muoth en siu epos il Cumin dad Ursera cun 525 lingias. Suenter l'elecziun dil mistral stueva quel surdar agl avat da Mustér in pèr vons alvs sco segn d'obedientscha. Ils tscheins han ils habitonts stuiu pagar vinavon ed il contract vala tochen igl onn **1649**. Quei onn secumpran ils Uranès libers da tuttas obligaziuns enviars la claustra. Regurdond vid quella part historia dad Ursera fa il mistral dad Ursera aunc oz part alla fiasta da s.Placi. Dil reminent san ils d'Ursera festivar in auter onn il giubileum da 500 onns dapi igl impurtont cumin da **1425**.

Cantada

Il cumin d'Ursera da 1425

da Giachen Casper Muoth, Breil

...

Ina loscha cavalcada,
Roscha ferma sco da guerra,
Pass' ils trutgs de Val d' Ursèra :
Segner Pieder de Pultengia,
Igl avat de Desertina,
Va a pêr cun Clau Camengia,
Il massèr de glieut cumina,
E migiur de Hospental.
Quels suonda Gion Pultengia
Sco menader e mistral.
Segner Pieder sin viadi
Culla glieut dil vasalladi, -
Cumpognaus da quater paders,
Il capavels urentaders
Dellas caussas e fatschentas
Delicatas et urgientas,
Pertgiraus dals campiuns,

Sempels nobels e baruns.

...

Davos fastitgs dalla famiglia

Igl onn 1500 ei in Pontaninger sesents en Lumnezia ed igl onn 1515 igl Junker Hans Pontaninger e sia dunna Ursula cun la mumma Tellya.

Mumpe Medel ed ils nobels de Putnengia

Ella brev dils 23 da schaner 1402, vesan ins ch'igl entir territori da Mumpé Medel era en possess dalla famiglia ministeriala de Putnengia. Clausen de Putnengia fuva il bab digl avat Pieder e Cilia, sia sora. Ils dus artavels, avat Pieder de Putnengia e sia sora Cilia partan il territori. Il bein encunter sera dalla Via Imperiala retscheiva Cilia, la quala venda sia part ad Ulrich Barlotta, mistral 1368 – εμπrem mistral enconuschent dalla Cadi. Igl avat Pieder retscheiva la part encunter damaun dalla Via Imperiala nua ch'il casti da Chischlatsch sesanflava. La parcella d'avat Pieder resta tochen 1846 en possess dalla claustra.

Tenor scriver da Guglielm Gadola ei la sora d'avat Pieder de Putnengia stada la pli buna signura dil casti. Igl ei da gronda probablada che avat Pieder e sia sora Cilia ein carschi si en quei casti.

Entras ierta d'avat Pieder de Putnengia ei il casti ius vi en possess dalla claustra da Mustér e sur ils onns ha il casti piars sia muntada. Ch'ei dat buca scartiras davart la muntada dil casti a Chischlatsch, ha probabel da far cun il fatg, ch'il casti era en possess dalla famiglia de Putnengia, ina famiglia ministeriala cun negina pussonza politica. Da quei temps eran las decisiuns politicas en cumpetenza dil prenci avat dalla claustra da Mustér.

Fontauna: G. Battista Manetsch en *Mumpé Medel 2024*

Rueras

In um da Rueras,

in da detgas, quel veva num Giusep Riedi, scheva per spass:

«A casa vai jeu enzatgei fetg intressant. Jeu hai ina gagliana nera, che fa ovs alvs.»

Sche jeu vess da nescher aunc inagada, vegness jeu ina gagliana. La gagliana, cu ell' ha fatg gl'iev schon avon ch'il solver, ha fatg tut.

Sch'ei fuss buca pil fein, gnanc segass jeu!

Avon che murir, lasch jeu la veta!

Jeu hai giu mo dus buobs, a perquei ch'igl ei stau dus buobs, vai jeu grad tratg si omisdus.

Cugl εμπrem stausch da colonisaziun el decuors dil temps miez (9 - 12avel) ei il spazi dalla val cun Sedrun e Rueras vegnius urbarisaus. Ina dallas impurtontas colonias sefa ord «Rova” (avonroman sbuau, fessa, ruclada) a Rueras ch'ei sesviluppau cul suffix *-aria* a Rueras.

Entuorn 1380 e 1391 ei documentau co 25 colonists dil contuorn da Rueras han representau ina associaziun d'alp independenta, l'alp Val Giuv, cun directivas sur dalla pastira e l'alp. Els disponan oravontut che negin dad els astgan surdar e vender beins e dretgs a personas d'ordeifer l'associaziun. Ina mesira da defensiun che sedrizzava encunter colonists immigrants da derivonza tudestga ni taliana. Observava in commember buca las directivas perdeva el ses dretgs alla cooperativa.

Sco representant dalla claustra funcziunava in statalter (roman vegl locotenent) ella val, oriundamein nominaus digl avat e convent, pli tard denton eligius libramein entras ils «vicini», ils vischins.

Dil temps dils signurs de Putnengia fuva Rueras in Meierhof cul "meier" che fuva responsabels per la rinnada dalla dieschma dils subdits ella val per surdar quella alla claustra.

Il statalter ei sesviluppau al president dalla val. Onns ora ha era il cassier da vischnaunca purtau il tetel da statalter (stalter).

La caplutta en honor da s.Giachen il vegl e s. Cristoffel vegn eregida igl onn **1491**. Il num local Flurin sur Rueras regorda ad ina caplutta en honor dil patrun dil sid dil cantun Grischun, sogn Flurin. En in document da **1368** vegn la caplutta menziunada. Sto esser ch'ella ei vegnida destruida d'ina bova ni d'ina lavina e buca pli reconstruida.

La baselgia da Sedrun, s.Vigeli cul santeri dalla val, ei stada la baselgia dalla val e tuts vischins digl ulteriur territori stuevan serender las dumengias e fiastas a Sedrun. Pér el **20avel** tschentaner han ils da Rueras survegniu dapli libertad ella pratica dalla religiun.

Da Rueras/Dieni parteva la via viers Selva ni viers Milez e Scharinas sil Pass Alpsu. Buca d'emblidar il Pass La Crusch che ha giugau entochen l'erecziun dalla Punt dil Giavel ina impurtonta rolla pil transit nord – sid.

Igl onn **1959** retscheivan ils da Rueras lur scola nova e Sedrun igl onn **1962**. Il vitg sez posseda pliras casas cun veglia sostanza dil 17avel tschentaner. In bischu ei la part dil vitg entuorn la suleta truaisch dalla val. Ils davos **30** onns ei il svilup per Rueras buca staus d'avantatg. Il vitg daventa pli e pli fetg habitaus da gliued dalla Bassa. La scola ei vita dapi igl onn **2006**; las stizuns da victualias ein svanidas, medemamein la posta, in'ustria, ina scrinaria, il puresser ei minimis – ed inaga fuva il vitg pli bein populaus che Sedrun!

Pulanera e Val Mila

La panaglia sin la lavina

A Rueras fagevan ei tscheiver e legher e lu grevan ei : «Péra mondi preit e paglia! Mo ch'ei resti la panaglia!» Lu ei vegniu giu la lavina giu dalla Pulanera ed ha mess sut la gronda part dil vitg e la panaglia era giu Mila sin la lavina. Quei ei stau la pagaglia per las beffas. Quei ei stau gl'onn 1749. Il farrer da Sedrun mava enta Rueras tier quella disgrazia ed ei vegnius en la lavina a Zarcuns. Ei schevan, che las strias da Caschlè hagien fatg vegni quella lavina, perquei ch'il farrer vevi benediu la platta da barlot.

Ella historia ei Rueras ius igl onn **1749** cun ina lavina dalla Pulanera e Mila cun 64 morts! Igl onn **1817** serepeta la disgrazia cun 27 morts.

Ina transversala nord-sid – planisada ils onns 1850/60

Ils onns **1850/60** lai il cantun Grischun planisar la construcziun da viasfier sul Spligia e sul Lucmagn. Igl onn **1869** sedecida la Confederaziun per la varianta Gottard. Quella decisiun ha paralisau il traffic da mercanzia atras il Grischun.

Il project viafier dil Lucmagn

La viafier fuss arrivada da Cuera a Mustér e da leu secuntinuada sul Pass Lucmagn e vi el Tessin. L'idea era quella da colligiar la viafier dil Gottard cun desiter dil tunnel da basa Gottard cun quella dil Lucmagn. Ina varianta fuss stada

quella cun in tunnel naven da Mustér sut il Péz Tgietschen ora e vi ella Val Maderana cun ina lunghezia da **10.6 km**. Il tunnel vess giu da prender sia entschatta si CuoZ che schai circa **100 m** pli ad ault che la staziun. In gronda sfida fuss stada tenor ils projectaders co dumignar quella altezia!

La viafier atras la Val Strem

Da Mustér fuss la viafier secuntinuada tochen en Tujetsch. L'entschatta dil tunnel era previda el sid da Sedrun sin ina altezia da **1345 m s.m.** La sortida fuva quasi silla medema altezia ella Val Maderana. Denton, era l'idea dad ir cun la viafier dalla Val Strem enasi ei vegnida prida en egl. Il tunnel sut il Krüzli ora fuss daventaus bia pli cuorts, mo vess pretendiu l'erecziun da numerusas gallarias dalla val enasi. Quella varianta vegn schada curdar en favur dil pli cunvegnet trassé atras la Val Mila.

Trassé da Rueras atras la Val Mila

La Val digl Etzli e la Val Mila s'entaupan quasi sin la medema lingia grada nord-sid. Il tunnel da basa vess priu l'entschatta sin ina altezia da **1398 m s.m.** e fuss da l'autra vart dil cuolm sortius silla medema altezia. Sco tiella versiun Val Strem



fuss il trassé passaus in tschancun dalla Val Maderana enasi e lu semenaus en pendenza successiva da l'autra vart, vart dretga, ora e giu ella val dalla Reuss.

Per Rueras eran aunc previdas duas autras variantas. La varianta A cuntinuava da Rueras viers vest e semenava lu a Sumsassi vi sul Rein ed en direcziun Val Mila tochen sil punct **1644** e da leu atras in tunnel culla sortida egl Uri silla medema altezia. La varianta B cuntinuava dalla val enasi entochen Selva, fageva leu la semenada dalla spunda da Selva orasi, tras gl'Uaul Tschuppina en direcziun Val Mila entochen silla altezia dil punct **1846** e lu atras in tunnel cun sortida silla medem

altezia ella Val digl Etzli.

A Selva setschenta la damonda als projectaders da cuntinuar culla viafier viers il Pass Alpsu e da leu giu ad Andermatt suandond parzialmein la via dil pass. Da Rueras ad Andermatt mesira il tschancun dalla viafier **24 km** e da leu a Flüela **52 km**. Era la colligiazion culla viafier Gottard e Lucmagn ad Andermatt vegn prida en vesta ed ei medemamein ina part dil project. Era in tunnel da Selva anora entochen a Wassen vegn prius en consideraziun.

La cuntinuaziun

Da Rueras viers Curaglia passava la viafier la vart dretga dalla Val Tujetsch cun prender en l'altezia sur Mompe Medel e da leu en direcziun Pass Lucmagn senza preveder in tunnel da basa.

La Gasetta Romontscha dils onns **1860** rapporta pliras ga davart quei project gigantic. Aschia plaيدا il rapport dalla emprema gasetta digl onn **1861**: *El novissim temps eis ei vegniu alla glisch in project per ina fusiun dallas rivalisontas viasfier sul Gottard e Lucmagn. Tenor quel duessen ins menar la viafier alpina naven dil*

*Lag da Lucerna tochen sur Amsteg, da leu ella Val Maderana e tras in tunnel da 7 - 8 kilometers, circa in'ura e mesa, sut il Pass Kriüzli a Sedrun e da leu sul Pass Lucmagn. Sin quella moda savessi ins unir la Svizra Meridiunala e Centrala cull'Italia tras ina viafier che custassi **14** milliuns pli pauc che quella sul Gottard. Ei para ch'ils Tuatschins, che vulan „nuet“ survegnan tut: la via sul Cuolm d'Ursera e la viafier cun in stupent „bahnhof“ el Plaun Sedrun.*

Reflecziun

La viafier transversala neu dalla Val Maderana, tras la Val Tujetsch en direcziun Lucmagn ei buca vegnida construida. Ei quei schizun stau positiv pil svilup dalla val? Senza dubi, tut vess priu in'auter decuors. Tgeinin? La viafier vess segiramein purtau bia lavur ed occupaziun ella val cun numerusas plazzas da lavur. L'emigraziun ord la val vess carteivel mai giu quella dimensiun, ni ella America ni giu la Bassa. Carteivel vess il turissem d'unviern priu sia entschatta bia pli baul ella val Tujetsch.

L'emprema varianta vess dau a Sedrun ina staziun sut baselgia el Prau da Vitg ed ella vischinonza l'entrada el tunnel da basa; ni massa gallarias dalla Val Strem enasi! La varianta Rueras: Giu Mila sesanflassen oz plirs binaris ed il grond traffic nord-sid caschunass tgunsch canera disturbonta pil vitg da Rueras e la val. Il vitg da Rueras fuss carteivel carschius, semidaus e vess forsa vargau la muntada da Sedrun. Las semenadas sur Sumsassi ni Selva vi en Val Mila vessen tartignau las bialas cuntradas da Giuv, Nurschai e Malamusa.

La varianta cun Selva vess deformau la cuntrada da Selva cun ina gronda staziun e cun l'entrada d'in tunnel da basa vi egl Uri.

Tgisa co tut fuss sesviluppau? Mintgin sa cheu sez fa sias atgnas ponderaziuns!

Rein Anteriu

Il calzer dad aur

In di era il caverer sil Crap dalla buna veglia sut la Siala. In artg steva sul Rein vi. Il caverer ha viu la dunna veglia che steva sut il crap en ed ella ha detg ad el: sch'el possi trer in calzer sugl artg ora, sche vegni anavos in dad aur. Mo il caverer ha patertgau: sche jeu tilel siadora in calzer, sche lu hai jeu mo pli in, ed el ha buca fiers.

Il Rein ei **1232,7** km liungs ed ei in dils flums cul pli bia traffic dil mund. A Rotterdam sbucca el ella Mar dil nord.

Il Rein Anteriu ei in dils dus flums da fontauna dil Rein. Siu intschess da **1512** km² e secatta per gronda part el cantun Grischun. Il Rein Anteriu ei cun circa **76** kilometers **5%** pli liungs ch'il Rein Posteriur (**64** km). Il Rein Anteriu ei denton empau pli pigns ariguard il quatum d'aua da **53,8 m³/s**, Rein posteriur **59.6 m³/s**. Rein Anteriu ei era stau il num d'in district ch'ei vegnius scaffius gl'onn **1851** cun la nova organisaziun dallas dertgiras grischunas. Siu territori fa part dapi gl'onn **2001** dalla regiun Surselva.

Fontaunas

Dils flums laterals dil Rein Anteriu san entgins vegnir numai equals. Quei ein entochen la confluenza dils dus reins:

- Dus dutgs el territori da Puzas e Milez (omis dus entuorn 70 km)
- Rein da Tuma, cumpriu il Lai da Tuma ed ils dutgs affluents (entuorn 72 km)
- Rein da Val ord la Val Val (entuorn 70 km)
- Rein da Maighels (entuorn 76 km)
- Rein da Curnera (entuorn 75 km)

- Rein da Nalps (entorn 72 km)
- Rein da Medel, Reno di Medel, Rein-miez, numnaus Froda (entorn 77 km)


La fontauna la pli liunga schai buca al Pass Alpsu, mobein ella vischnaunca da Quinto e senumna Reno di Medel (Rein Miez) che percuora la Val Cadlimo

Fontauna s. Martin

Il turmegl

Quei hai jeu viu sco buob. Quei ei schabegiau a Zarcuns sil prau da Martin Valier. Mintg'onn mava il fein da quei prau ell'aria suls cuolms. Sinquei ei igl aug vegl, il Luis, vegnius vilaus. El ha tratg il cunti da sac suenter il turmegl da fein e quei cunti ei staus naven per quella stad. Gl'atun ei il Luis ius a fiera o Mustér da Sogn Martin. Cheu ei vegniu ina dunna da Medel cun in cunti. Quellas femna ha turnau il cunti, che Luis veva tratg suenter il fein sil prau a Zarcuns e detg: Vus veis spindrau mei. Jeu vevl fatg patg cul gianter ed ussa sun jeu puspei secunvertida. Jeu engraziell persuenter e dun a vus il cunti per in survetsch bein fatgs.

Sogn Martin ei il patron d'ina Fontauna, ni dalla respectiva pastira vischinonta. La fontauna sesanfla buca lunscha naven dalla piazza da giugs, ussa amiez igl uaul, antruras carteivel sin in toc pastira. Daco ha quella fontauna astgau retscheiver il num da quei sogn? Quei vegn a restar in misteri.



Sogn Martin ei il sogn che vegn festivaus ils 11 da november. Quei datum valeva sco termin da pagar deivets e tscheins. Buca per tuts era quei di beinvegnius e beinenqual famiglia perdeva quei di ina part da lur fatg, sche buca tut.

La pli impurtonta bun'ovra da sogn Martin ei la surdada dalla mesadad da siu manti da schuldada ad in pupratsch. Plinavon saveva el esser il medem mument en dus loghens, communicar cun animals e ballar

(schweben).

L'Ondadusa

In num empau misterius cun tun sonor. L'Ondadusa ei stada in run, in sbuau (bova) che ha formau il bellezza spazi agricol denter Rueras e Zarcuns. Il vallatsch ei denton era staus in attent prighel da lavinas – oz segirau entras las novas lavineras e plontaziuns el dartguir dall'Ondadusa/Londadusa.

Giu da l' Ondadusa vegn il Dutg grond. Sillas pli veglias cartas geograficas dils onns 1850, furneva quel era l'aua pil vischinadi da Zarcuns e sbuccava silsuenter el Rein da Strem.

Il Dutg Grond ei staus in tierm per la val, aschia sco il Sumsassi, el ha spartiu la val en quels dadens e quels dado il Dutg Grond. Ils carstgauns ein cun quei tierm vegni fatgs auters, retschiert in bul, magari ei il tierm era vegnius surduvraus per dar teccas e steccas. Denton adina en bien senn e senza consequenzas – il tipic dafar denter dus vitgs pli gronds, semeglient al patertgar denter Tujetsch e Mustér.

El vest da Zarcuns sederscha igl onn 1749 ina lavina giu dall'Ondadusa a val e satiara treis umens, duas dunnas e sur Giachen Bearth, plevon da Sedrun e

destruescha dus clavaus. Quella lavina hagien las strias rut ora, raquenta la tradiziun. Il caplon ch'eri sin via a Rueras per dar support als disgraziai ella lavina dalla Pulanera e Mila, havevi emblidau la stola. Las strias hagien clamau: «Stuschei, stuschei, el ha emblidau la stola.»

En memoria als disgraziai penda ina crusch, ina aschinumnada "Arma-Cristi" vid ina casa sper la via veglia a Zarcuns. Ils simbols tipics vid la crusch regordan vid las suffrientschas da Jesus vid la crusch: peis e mauns perforai, in cor ardent, la cruna da spinas, sugas, zaunga, hostias, treis quadrels, tgiet, tuaglia, cup da Pilatus, lontscha, guotas, petga, scala, calisch.

Prau Cumin

Il num en quei liug, el vest dalla serenera, fa igl emprem mument surstar. Cumin per tgi, in prau per tuts? La tradiziun raquenta ch'ils Gualsers dalla val hagien fatg diever da quei prau per tener leu lur cumin.

Zarcuns

La platta dil barlot

Si Caschlè eis ei ina gronda platta, nua ch'ins vesa aunc oz ils peis dallas strias, ch'ein nudai en el crap. Sin quella platta schischevan ils cavrers bien a savens, mo mintga gada cura ch'ei sedestadavan eran ei sper la platta giu. Gie, in era inagada schizun tochen giu Rodunda cura ch'el ei sedestadaus. Quei di ch'il prer ha scungierau il striegn, ruclav'ei buca legher crappa sur el ora. Mo el veva si la stola ed aschia savevan las strias far nuot dil mal. Mo inaga cura ch'il prer leva ira enta Zarcuns vev'el emblidau la stola e; cu' ei staus en ord Camischolas, sch'udevan quels che mavan ordavon e che vegnevan suenter: „Stuschei, stuschei, il ner vegn." Enaquella ei la lavina vegnida giu e satrau el.

Il num deriva da "sulcus starrare, zuolc" e fa attents sin in terren zun adattau per la cultira da graun ed ils buns praus. Pli baul anflan ins era il num Cazarcuns ni Gazarguns; **1545** Fatzanguntz, **1555** Sarkuns e **1630** Sarcuns.

La tradiziun ni la detga raquenta dalla appariziun da Nossadunna a Zarcuns igl onn **1622** al Gionet da Giuv e ch'ella hagi giavischau da quel la construcziun d'ina caplutta el liug dalla cumparaziun. Ella laschi persunter madirar il graun egl entir Tujetsch. La caplutta ei dedicada a Nossadunna dalla neiv.

Igl onn **1749** destruescha la lavina dalla Val Mila e Pulanera ina gronda part dil vitg da Rueras e caschuna la mort a **64** personas. Da Sedrun arrivan plirs habitonts per dar agid, mo dadens Zarcuns vegnan quels satrai d'ina lavina giu da Londadusa. Sis personas piardan la veta.

Camischolas

Camischolas: **Campus de bestia** (areal da nuorsas ni bein da nuorsas) (Campus de bestia - Campiescha - + fuorma diminutiva -ola). Il plaid bestia vegn oz mo pli duvraus ell'Engiadina per nuorsa (bes-cha). Tier nus munta el oz la biestga (Vieh), ils armauls.

La caplutta da s.Onna a Camischolas ei vegnida eregida all'entschatta dil **16avel** tschentaner, igl onn **1515**. Il fetg bi e custeivel altar gotic datescha digl onn **1517**. Pader Placi a Spescha ch'ei staus da **1809-1812** caplon a Selva e **1812-1815** caplon a Sedrun, scriva en sia descripziun dalla val digl onn **1806** il suandont sur dalla caplutta da s. Onna: «*Der äusserliche Bau derselben ist unansehnlich, die innerliche Auszier aber vorzüglich, was die Altäre anbetrifft sehr angenehm.*» Ed en in auter liug:

«Die Kirche St. Anna in Camigolas ist inwendig fein ausgeziert.»

Per il di da s. Placi digl onn **1822** ei gl'entir vitg da Camischolas barschhaus giu. Tier quella disgrazia ei era la caplutta d'aventada in'unfrenda dil fiug. Sulettamein ils mirs eran restai e differentas statuas, caussas moviblas e parts digl altar gotic ch'il plevon e caplons ein vegni da spindrar. Duas unfrendas ha il barschament caschunau, l'Onna Maria de Pally e Maria Liberata Rothmund da siat onns. La tradiziun raquenta che jasters hagian dau fiug e scappai sul Pass la Crusch.

Camischolas fuva antruras in tipic vitg suenter la via, la veglia e la nova. Oz ei il vitg carschius encunter nord ed egl ost ei il vitg seligius cun Gonda. Il cunfin denter quels dus vischinadis va dalla Garascha Berther en lingia grada encunter la Val Strem.

A Camischolas fuva bi habitar, praus e pastiras en abundonza. Aschia secloma ei era ch'ils purs rehs dalla val erien a Camischolas. Cun Zarcuns e Camischolas Sura fuorma Camischolas aunc oz in vischinadi.

Val Strem

Las femnas, che fagevan camischas enta Strem

Ina gada era ei enta Strem in buob, che pertgirava la muaglia, ed ei era il di da Sontgilcrest. Mo quei buob saveva buc, ch'ei fussi Sontgilcrest. Lu ha el viu duas femnas, che fagevan camischas. El ha enconuschiu quellas ed ha dau ad ellas da sia marena. Ellas han magliau mo caschiel. Avon ch'ira naven, han ellas detg ad el: „Mira che ti hages oz tias genetschas ensemen, pertgei ei vegn aunc ina burascla!“ E beingleiti eis ei vegniu ina terribla malaura cun neiv.

La Val Stren s'extenda da Valtgeva encunter nord e finescha el funs dalla val cun seniester il Péz Tgietschen (Oberalpstock), il pli ault péz dalla val cun ses 3328 m.s.m e dretg il Witenalpstock. La stad ei la val stada naven dils Bauns anen, cascadas dil Rein da Strem, alp da stiarlas. En cass da neiv la stad vevan els l'untgida ellas Plauncas verdas, ni ora giu el funs, ni schizun tochen giudem l'Ondadusa. La pastira dils Bauns anen ei biala cun in liung plaun, dretg e seniester spundas cuortas cun ina jarva alpina e savurusa per tuts animals. La stad vegnevan las cauras catschadas da Sedrun enasisum la val, encunter il Krüzli e Caschlè, adina sur la pastira da biestga. Oz ei l'alp in'alp da nuorsas.

La part giudem dalla val han ils da Gonda e Camischolas pasculau culs animals da casa, quei principalmein la stad. Ils dis caulds mavan ils pasters bugen dalla val en. Schiglioc pasculavan ils da Gonda il Plaun Valtgeva e contuorn ed ils da Camischolas il Maises e contuorn.

Cuort all'entschatta dalla val sesanflan las Fontaunas sogn Gions che furnescha aua da beiber. La fundaziun dalla corporaziun Fontauna Sogn Gions ei succedia igl onn **1931**, suenter in unviern cun scartezia d'aua e ferdaglia. Principalmein ils vitgs da Camischolas e Gonda han giu miserias d'aua. En diversas radunonzas separadas e comunablas han ils dus vischinadis tractau la damonda per l'ereziun d'in aquaduct ed alla fin da matg **1931** han ins decidiu da far caussa comunabla. Era ils vischins da Zarcuns ein bein spert sedecidi da seprofitar da quella caschun.

Îls 24 da zercladur **1931** ha la vischnaunca dau la concessiun da tschaffar las auas da **5 ni 6** fontaunas sin territori da Fontauna Sogn Gions, ni Dadens il Mir; il mir era vegnius construius per retener ils tiers. Las lavurs ein aunc vegnidas

terminadas quei onn. Oz vegn l'aua repartida sin tuts vischinadis el vonn principal dalla val, Dieni tochen Sedrun cun Surrein

La val Strem ha giu impurtonza historica. Il passadi sul Pass la Crusch vi el cantun Uri ha duront tschentaners surviu per in passadi impurtont da nord el sid e cuntrari. La traversala passava Sedrun, ascendeva Stagias e cuntinuava il viadi sul Lucmagn. Cun l'avertura dalla Val Caschinutta el **14avel** tschentaner ha quella traversala piars tutta attractivitat.

Il mars **2016** destruescha ina bova giu dalla costa dil Cuolm da Vi la part d'avon dalla val e sederscha tochen els praus da Praus Strem. Dapi lu ei la senda serrada atras la val. L'untgida sur Caschlè possibilitescha tuttina dad ascender il Pass La Crusch. La Via da s.Giachen ha aschia piars sia rutta tradiziunala ed ei ussa marcada atras la Val Mila e sur la Mittelplatten.

Ovras hidraulicas

Ils 13 da fevrer **1955** ei staus in di historic per la val. Ils vischins dalla val vendan tuttas auas dalla val alla NOK. L'entschatta dils onns **1960** vegn, suenter ch'ils vischins dalla val han sefatg en la "tuppadad" da ver vendiu tut las auas, priu anavos las concessiuns dalla Val Strem, Val Mila e Val Giuv. Pli tard sefuorma la KVR/ORa l'Ovra electrica Rein Anteriur ed igl onn **1957** entscheiva quella societad a baghegiar el decuors da **12** onns l'infrastructura ed ils dus lags artificiali Nalps (**1962**) e Curnera (**1966**). Il lag da s. Maria sil Lucmagn, il tierz dils lags che furneschan l'aua alla centrala a Sedrun, vegn terminau igl onn **1968**. Igl onn **1960** dumbra la val **1855** habitonts, da quels ein rodond **600** luvriers vid las ovras hidraulicas. Quels vivan en baraccas sils differents plazs da lavur.

La vischnaunca arva per dus onns ina scola tudestga cun **15** affons dallas famiglias dils responsabels per las ovras ch'ei secasai els vitgs ella val.

Il tscheins d'aua ei per la vischnaunca ina entrada che possibilitescha in grondius svilup alla val. Ils emprems projects che vevan grond basegn ein l'erecziun da duas casas da scola, **1959** a Rueras e **1962** a Sedrun. L'erecziun dils runals ein era vegni possibilitai entras las novas entradas, ton che la vischnaunca ei separticipada cun in capital da **51%**.

Dapi anno **1918** posseda la vischnaunca ina atgna ovra a Sedrun/Gonda. Quella vegn engrondida cun plazzar la centrala giu Prau Cumin ed ina ulteriura ovra vegn construida cun l'aua dalla Val Giuv.

Ils onns **1960** sefuorman historicamein fastitgs dil grond svilup dalla val cun las grondas midadas. Il turissem d'unviern, mo era il turissem da stad, prenda da lu naven il surmaun. Il tradiziunal sedecimescha. La val daventa en tuts graus outra. Ed ils carstgauns?

Gonda

Sinzur

Ina femna habitava a Selva en ina casa veglia. Ella era ina pulita femna e mava a gidar ils auters. Il feagl, che veva num Vigeli, era maridau a Gonda. Ils dus davos onns steva ella a Gonda cul feagl. Allora eis ella morta a Gonda. Quella notg ch'ella ei morta, eis ella cumparida cheu en nossa casa dad esch-stiva en. Mia dunna durmeva en stiva. La dunna ch'ei cumparida ha detg nuot. Ella era vestgida bein. Lura eis ella turnada dad esch ora e serrau igl esch culla falla ed ida. Nus vein udiu ils pass, che mavan naven. Ella ha vuliu far da saver, ch'ella seigi morta. Quei era ina buna femna.

Il num Gonda munta ina planira da crappa derivonta dallas spundas dil Cuolm da Vi e dalla Val Strem. Gonda ei in vischinadi cun bia pastira da casa, Valtgeva, Vons, Val Strem da vart seniastra tochen en Plaunca Fadal e beinsavens ha quei dau dispetas culs vischins da Sedrun che fuvan buca aschi favorisai cun pastira da casa.

Era la damonda nua tschentar la staziun principala dalla viafier ha la finala Gonda gudignau ils onns 1910/1920. Dapi 1925, ufficialmein 1926, ei quella en funcziun. La secunda casa da scola astga Gonda retscheiver e quei oravontut muort ils da Camischolas che levan ver in cuort viadi da scola per lur affons. Quella ei vegnida erigida igl onn 1886 sin terren dalla pleiv a Sontget/Dulezi. La casa da scola existenta stat era a Gonda e quei dapi igl onn 1962. Sil vegl plaz dalla scola veglia vegn igl onn 1975 baghegiu la casa communal cun tuts uffecis e la fatschenta dalla energia alpina.

A Gonda sesanflan:

- sis ustrias/hotels,
- treis stizuns,
- la Residenza cun habitaziuns per attempai,
- duas bancas
- casa per carschi impedi
- conditoria
- ina garascha,
- treis camps da giuvenils
- staziun dalla pendiculara Cuolm da Vi
- runals Valtgeva
- la scola e scoletta dalla val
- la staziun dalla viafier
- in mulin
- La Talina, local per la giuventetgna
- la Halla da sport e cultura Dulezi
- l'energia alpina

Sedrun

L'ura ei cheu

Sut Sedrun eran duas mattauns vid il zerclar. Tutenina han ellas udiu ord igl uaul sut Cavorgia ina vusch che scheva: L'ura ei cheu, mo igl um ei buca cheu. Cuort suenter arriva in um sil meglier tut a spruns dils Plauns Sedrun giu ed ha detg: Jeu stoi spert ir a pinar in badugn giuls Rovens. Las zerclunzas, che vevan gest udiu il clom misterius, sminavan nuot bien e levan retener igl um, mo quel ha buca schau metter giud via. Returnond igl um buca anavos da miezdi, han las zerclunzas temiu ed ein immediat idas egl uaul sut Cavorgia per mirar, tgei che seigi schabegiau, e lu han ellas anflau igl um morts spel badugn giu.

Il num Sedrun ei levs dad analisar: sin in run, numnadamein fundaus e plazzaus sil Drun dalla Val Ruinatsch. Il Drun che nus enconuschin detg bein, quel denter Gonda e Sedrun ei seformaus pli tard, quei fa ina scartira da 1643 valer che di ch'il plevon savevi ir dalla baselgia vin Dulezi en casa pervenda e traversar il dutg dil Drun sur in'aissa. La historia documentescha il num igl onn 1483 Surdragun, 1555 Sadrun, Sudrun e 1557 Sudragun.

Daco duess Sedrun buca esser igl emprem vitg fundaus ella Val Tujetsch? Nuot tschontscha encunter. Plinavon ei Sedrun il pli maneivla liug per ir ils emprems tschentaners a S. Gada/ Mustér als survetschs divins avon l'erecziun d'in agen sanctuari ella val.

Igl onn **1205** ei la baselgia en honor da s. Vigeli vegnida benedida e consecrada. Cun la baselgia parochiala ha Sedrun quasi survegniu la muntada da liug principal dalla val, la capitala. Quels onns fuva la baselgia il sulet sanctuari dalla val, pia baselgia dalla val cul santeri per l'entira pleiv.

Fin dils onns **1840**, ed ils onns **1850/1860**, baghegia la vischnaunca tschun casas da scola. A Sedrun vegn la scola per Sedrun, Gonda, Camischolas, Surrein e Bugnei baghegiada igl onn **1848** sil plaz Cadruvi ensemen cun la habitaziun dil caplon. Ils da Camischolas han buca vuliu separticipar ed han lu igl onn **1862** baghegiu in'atgna scola.

Igl emprem hotel vegn baghegiu a Sedrun, il hotel Cruna ils onns **1850**. Igl onn **1857** vegn el numnadamein numnaus per l'emprema gada en ina gassetta. Avon surveva la casa pervenda sco liug da dunsena pils paucs hosps e viandonts che traversavan la val pil pli il temps da stad. Senza dubi la pli marcanta casa ei la Tges'alva amiez il vitg ch'ei vegn eregida el decuors dil **17avel** tschentaner.

Sil plaz Cadruvi ein las radunonzas da vischnaunca vegnidadas tenidas entochen ils onns **1960**. Il temps dils moviments liberals sesanflava sin Plaz Cadruvi ina plonta dalla libertad (plans dalla via da **1837**). En ina zun turbulenta radunonza han ils vischins dalla val decidiu igl onn **1860** da sustener l'erecziun dalla via atras la val ch'ei lu stada terminada igl onn **1864**.

Sedrun ha plitost pauca pastira en cumparegliazion cun Gonda e cheu ha ei dau nuot auter che da secunvegnir cun Gonda e quei ei buca adina iu en tutta perinadad.

L'emprem'aua vegn menada en bishels el Hotel Cruna, igl onn **1906** meina la famiglia Decurtins l'aua dalla Val Custeri giu en siu niev hotel, igl Alpsu. In aquaduct per tuts vischins vegn eregiu silla Val Bugnei igl onn **1911**. L'emprema energia electrica furnescha il mulin da Gonda igl onn **1918** ad entgins privats, mo beingleiti, e quei enteifer igl onn **1918**, han tuts vischins da Sedrun e Gonda saviu retscheiver energia electrica entras l'aua menada ord la Val Strem e cun bishels da pressiun naven da Salins ell'ovra hidraulica a Gonda.

In stan da sittar sesanflava ensi las Schibas, in tschancun plinensi che la staziun da val dalla sutgera Cungieri. Ins sittava naven da Salins-Sura osum il Drun. L'emprema industria a Sedrun ei la firma da pegnas da **1945** enasisum il Run, oz camp Salins.

A Sedrun sesanflan (**2024**):

- 1 fatschenta da victualias
- 2 hotels, 1 restaurant
- 4 camps
- pliras fatschentas; sport, ...
- ina firma da baghegiar
- il bogn cuvretg

- il Museum La Truaisch
- la baselgia parochiala cul santeri
- in sontget
- 1 fatschenta da transport
- dus biros d'architectura
- igl Archiv cultural Tujetsch
- ina piazza da giugs

Il Run/Drun smanatscha dapi il **17avel** tschentaner ils dus vitgs Gonda e Sedrun. Igl onn **1834** sevolva il Run encunter il vitg e meina naven ina part dil santeri. Ils onns **1960** ein travs da betun vegnidas francadas el vau e quei ha gidau ed il run ei buca pli secavaus afuns e las spundas encunter vest ein sestabilisadas. Ina ga ad onn vegn il run segiramein ed igl ei buca da sutschazegiar il prighel da quel. Denton di la tradiziun: *Vul ei dar in bien onn en Tujetsch, sche sto il Run da Sedrun vegnir treis ga cotschens.*

Il prighel da bovas sul vitg ha sfurzau ils vischins da Sedrun ad ina prevenziun. La Val Ruinatsch e la Val Custeri ein stadas quellas cun potenzial da smanatschar il vitg. Sco prevenziun ei vegniu cavau in foss si Cungieri per menar l'aua naven encunter vest el Run. Aunc ils onns **1980** ha la Val Custeri smanatschau ed ina bova cun au a e material ha tartignau la vischinonza dil Sontget dils Gediis.

Era las lavinas han smanatschau il vitg. Igl uaul el nord dil vitg ei vegnius sminuius a moda nunponderonta il **19avel** tschentaner ed aunc l'entschatta dil 20avel. Stempraus han contribuuiu il lur. Igl uaul sur Sedrun ha stuii vegnir replantaus. Tuttina resta in prighel per Niregl a caschun da grondas nevadas.

Surrein

Scazis zuppai

Naven da Surrein vesevan ins la sera denter stgir a clar sin in prau in tac ner, in um, che pertgirava leu siu scazi. Suenter han ins arau quei prau la primavera. Allora, tuttenina levan las mugias buca ira pli, ed il pur ha smuldiu sillas mugias e sgiavlau, e lu ha el udiu a bargend enzatgi ed in sballunar daners, e las mugias ein lu idas e tratg orasi ina manetscha dad in priel. Sch'il pur vess enstagl sgiavlar detg: «Mei el num da Diu!» vess el giu in priel plein daners a spindrau in'olma.

Sper Cavorgia in dils dus uclauns da vart dretga dalla Val Tujetsch. Il num indichescha la situaziun geografica, manegiau vi sur il Rein Anteriur vi Surrein = Sur il Rein.

Aunc el **18avel** tschentaner fuvan las uclivas da Canadal, Nacla all'entschatta dalla Val Nalps e Sax si encunter il Tgom habitai.

Surrein, e quei muort la vart umbrivauna, ha tuttina retschiert ils davos decennis enqual casa nova. La part sut ei Surrein (Sut) e la part sisum senumna Foppas.

Ils onns **1960** ein projects naschi per erreger in territori da skis da Surrein si encunter il Tgom e vinavon tochen enasisum l'Alp Tgom. L'entschatta ei vegnida fatga igl onn **1967** cun in runal da Claus tochen si sut la via da Nalps. El vegneva fetg bugen frequentaus dils affons da Sedrun, Gonda e Surrein. Igl onn **2003** ha el stuii svanir ord motivs da midadas da structura ed ils plans d'engrondaziun dil territori ein mai vegni realisai.

	<p>La veglia colligiazion cun Surrein e Cavorgia mava da Sedrun/Gonda dil Run giu, sur la Punt Baselgia, si Surrein e tras Claus e Clis vin Cavorgia. La via vegneva era numnada la via da bara dils da Maun Sut. L'entschatta dils onns 1910 ei la via da Sedrun, giu las Vals e cun ina punt sul Rein Anterior, vegnida erezida. Il grond levgiamet ed access plascheivel per omisdus vitgs ha la punt sul Rein giudem ils Plauns Sedrun finalmein purtau ils onns 1980.</p>
--	--